



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tir_yimiyim

tir yimiyim

TAPAK 8

Madison Keys-i Australian Open kokogo

Haryana nung BSP lenir Harbilas Singh khaset

VOL. XXII ISSUE NO. 102 (ADOK 102)

DIMAPUR AMUNGNÜ (SUNDAY)

AENJETI (JANUARY) 26, 2025

₹ 5.00

15 buba National Voters' Day among

Dimapur, January 25, 2025 (TYO): Patkai Christian College (Autonomous), Seithekema nung January 25, 2025 nü 15 buba National Voters' Day (NVD) indang State Level Programme ayonga agiogo.

Iba sentong ya "Nothing like voting, I vote for sure" omen nung ajemdaker agi aser election nung shilem agitsü aser vote enoktsüba ya tongtipang ta asüba tangatetba prokshitsü atema liasü.

Sentong nung School Education, Principal Director Thavaseelan K, IAS-i alakteta jaoker ka ama shilem agi.

"Election maparen nung lanurtemi shilem agitsü aser democracy tashi itdaksütsüla. Indian Constitution nung Lok Sabha elections ya kanga tongtipang lir anungji lanurtemi vote enoktsüba tashi angatetsüla. Vote ka ajanga democratic maparen nung yarir" ta Thavaseelan-i ashi.

Paisa lanur voters dang pei kinungertem election nung shilem agitsü atema ajungmesotsü ayongzük.

Sentong nung Chümoukedima DC & DEO Polan John-ia NVD indang osang

lemsatapedang lanur voters-i democracy tashi itdaksütsü ayongzük.

"Lanurtemi election nung vote enoktsüba ajanga linük tarutsü yangertsü. Lanuputu vote enoktsütsü ajungmesotsüla, first-time voters ajungshitsüla aser loktiliba nung lanurtemi democratic maparen nung shilem agitsü tangatetba agütsütsüla" ta paisa metetdaksü.

Iba sentong nung Nagaland nung Election Department indang presentation ka sayu aser Patkai Christian College Vice Principal Dr. Rudowhelie Peseyie-ia o tatsüka jembii.

"Taküm Patkai nung iba benjung amongba ya lanuputu dak ranglokba lir. Lanurtemi vote enoktsüba ya tongtipang ta angatetra linük tarutsü asoshi shisabulu kecha mali aser pamoki tebilemtsü bena lennirtem shimtsü" ta Chief Electoral Officer, Nagaland Vyasana R, IAS-ia ashi.

Sentong nungsa Rajvi Kumar-i Chief Election Commissioner of India indang osang zünga metetdaksü aser Patkai Christian College nung Electoral Literacy Club (ELC) ajanga shilem agi.

NNF ketdangpur tasentem shimogo

Kohima, January 25, 2025 (TYO): January 24, 2025 nü Nagaland NGOs Forum (NNF) indang 4 buba General Session agiogo.

Iba sentong ya Tourist Lodge Dimapur nung agi aser omenji "To serve the suffering humanity" liasü.

President menden toktsür Povotso Lohe-i o jembidang Nagaland nung tenlaba maparen inyakba NGOs ajaki timtem ajuruba meimchirtem yaritsü bendanga agütsüshir yaritsü ayongzük.

NNF ajanga Nagaland nung NGOs atema külem sabang ka agütsür aser temetentem kümzüka ayur, ta Povotso-i ashi.

Iba sentong nung Rev. Dr.

Vikheshe Chishi-i temoatsü meshia sarasadem aser Vice President Vikali A. Zhimomi-i anküp tepela o jembii.

Iba session nung taruba küm 3 kümsük atema ketdangpur tasentem shima liasü. Tesüba nung tenteta aliba Selection Committee ka ajanga parnok shim.

President-Dr. Andrew Ahoto, Vice President-Vikali A. Zhimomi, General Secretary-Azungla James, Assistant General Secretary- Jess T. Murry, Treasurer-Ms. Annie Jain, Finance Secretary-Mariam Phom, Joint Finance Secretary- Keren Sumi, Organising Secretary-Alole, Information & Publicity Secretary- Lisali.

CM Rio-i IPR department den ajurutep

Dimapur, January 25, 2025 (TYO): Chief Minister Neiphiu Rio-i January 25, 2025 nü Department of Information & Public Relations den senden ka menogo.

Kohima nung Chief Minister's Office nung iba senden amen aser Information & Public Relations and Soil & Water Conservation Advisor Imkong L Imchen-i anir department ketdangsurtem aden.

Senden nung tang teinyakdak

mapatongtem aser tarutsü nung inyaksü aliba benoka lemsatetp.

IPR ketdangsurtemi parnok inyaksangshi nung tayongzükba balala ajuruba insang lemsatetp aser Chief Minister Rio-i department yaritsü nangzük.

Senden nung Chief Secretary Dr. J Alam, IAS, Development Commissioner Ramakrishnan, IAS, Commissioner & Secretary IPR, Tamsunaro Aier, IAS aser Director IPR, Dzvinuo Theünuo nung aden.

President Droupadi-i "One Nation One Election" pusema jembii



New Delhi, January 25, 2025 (Agencies): President Droupadi Murmu-i Honibarnü Republic Day osang lemsatapedang "One Nation One Election" sentong pusema jembii.

"One Nation One Election" ajanga ketdangsubaren tajungba akümtsü, policy anendaka ayuba majurutsü aser senotsü timtem ajema akümtsü ta President Droupadi-i ashi.

"Küm aika linük nung British nungeri yimsüsüba tangatetba nung dang arur aser sorkari iba tangatetba melenshitsu meranger. Linük nung criminal laws tasen asem ajanga British nungeri mapang yangluba criminal laws melenogo" ta lai ashi.

India nung criminal laws tasentem- Bharatiya Nyaya Sanhita, Bharatiya Nagarik Suraksha Sanhita aser Bharatiya Sakshya Adhinyam ya tetsürtem aser tanur nem temeten agütsütsü asoshi rangloker yangluba lir, ta Droupadi-i ashi.

"Asenok 1947 nung nüjiso angu saka British nungeri yimsüsüdang beshiba

tangatetba aika asenok den mapang talangka liogo. Tanü iba tangatetba melenshitsu merangba angur. Iba asoshi inyakba nung Indian Penal Code, Code of Criminal Procedure aser Indian Evidence Act melena Bharatiya Nyaya Sanhita, Bharatiya Nagarik Suraksha Sanhita aser Bharatiya Sakshya Adhinyam yanglutsü lemtetba ya tongtipang ka lir" laisa metetdaksü.

"Mapang ka nung election külemi agitsüba maparen atema mangdang tulu nungdaker. Parliament nung iba atema bill ka benokogo aser One Nation One Election ajanga tajangzük aika anguba den ketdangsubaren tajungba akümtsü, policy anendaka ayuba majurutsü aser senotsü timtem ajema akümtsü" ta President Droupadi Murmu-isa ashi.

"Linük nüjiso anguba mapang tesem aika sensaktia aser ayawara agi sünger liasü. ajisüaka asenoki tamang akangshi aser renloksü atema maparen tenzük" ta laisa Constitution indang jembidang ashi.

Constitution ya taküm aliba

kulikaket ka kümogo aser iba ajanga nübortem kibong ka ama alenbanger. Constitution ajanga asenok ajak külem India nungeri ta asüba tamendakdak agütsür, ta laisa shisem.

President Murmu-isa linük nüjiso atema taküm bendanga agütsürtem bilemtetsü aser lisopur lenir Birsa Munda sor küm 150 ajungba bilemtetsü ayongzük.

Laisa Mahatma Gandhi, Rabindranath Tagore aser Babasaheb Ambedkar nungeri independence movement kanga junga atonger linük longjemdaksüba atema tenüngsang agütsü.

"Constitution latetba Constituent Assembly nung tetsür züngsem 15 dena liasü aser iba ajanga India tsürtemi linük tia yangerba nung shilem agiba kuli agütsür. Alima tesem aika nung tetsürtem jenjang ajungkettsüba jipungmang ka ama alidang India tsürtemibo linük tia yangerba nung shilem agia liasü. Tanü tesayur tasen 60% bo tetsürtem lir" ta President Droupadi-isa ashi.

"India tarutsü atema mera agia aodang, tanü lanuputu mangdangtem aser talisa aiürtem mangdang ajanga linük nüjiso ngur küm 100 amongdang jenjang temabai ajungketer alitsü" ta laisa ashi.

"Mahatma Gandhi-i ochishiba, ozüng alema meinyakba aser meimchir dang dang masü saka alima asoshi aria bilemba tangatetbatem asenoki maneni beshitsü ayongzük" ta President Droupadi Murmu-isa metetdaksü.

Governor La Ganesan-i 76 buba R-Day salem abener

Dimapur, January 25, 2025 (TYO): Nagaland Governor La Ganesan-i nübor ajak den 76 buba Republic Day salem osang lemsatetpogo.

Küm 76 tejakdang asenok India nungeri linük temzüng agizük aser iba ajanga asenok iba linük nung sensotem ta maitsü akangshia liasü ta Governor Ganesan-i ashi.

"Asenoki meimba linük indang 76 buba Republic Day amongdang Raj Bhavan, Kohima nung nisung ajak dangi temeim salem abener. Iba anogo ya Constitution of India nem tetushi agütsüba anogo ka dang masü saka asenok linük ka ser külemi aruba benjungteper" ta paisa ashi.

"Iba anogo nung asenoki inyaktetbatem meyipa repranger aser linük tamendakdak akangshitsü tangatetbatem nangzükshir. India-i linük ka ama terenlok jenti ngua aruogo aser technology, education, health, o infrastructure nung mapa tajung inyaktetogo" ta Ganesan-isa ashi.

"Asenok rongsenketzüng

tsütsü tashitait kümogo aser alima sabang nung democratic tangatetba sayurtem lir. Senso shiai mapa tulu, tila inyakaka asen democracy tamendakdak akangshir" ta paisa ashi.

"Prime Minister Narendra Modi lenisüba kübok asenoki start-up ecosystem nung kanga tejakleni ogo. Nagaland-ia iba maparen kanga junga inyaker aser yaküm dang nung taküm start-ups 200% agi teimba kümogo. Iba takok ajanga asen lanurtemi tajung kümnüba aser alizüng ayuba sayur, parnoki rongsenketzüng renlokdaksür aser tasen purapiteter" ta Governor-isa ashi.

Nagaland nung aser linük nung aliba senso ajaki linük yangerba maparen nung bendanga agütsüshir shilem agitsü ayongzük. Asenoki linük azükarudaksütsü atema maneni shilem agitsüla ta paisa ashi.

"Nagaland-i linük tenzükba nung nüma atangtsüsa senmang nguteta lir. Naga nungeri aika defence forces nung lir aser

parnoki India kümzüka ayur. Asen Naga Regiment ajanga tasütait aser bendanga agütsüba len sayur aser iba ya asen state aser linük asoshi konang ka lir. Naga Regiment ajanga tasütait mapa inyakbatem asen national history nung teti atema züluoka lir" ta Ganesan-isa metetdaksü.

"Nagaland nung tasütait jabaso aser jalatemi shilem agiba ya lanurtem angazüktsü ajungshir. Parnok tasü aitba aser temulung uluba ajanga nenok len aniang, parnoki bendanga agütsüba ajanga nenoki linük yangerba nung shilem agitsü tangatetba agüjangma. Asenok ajak tebilemtsü abenba sensotem ama telongjem, yimjung aser tejakleni aoba tangatetba nung noktaksi" ta paisa ayongzük.

"Asenoki Republic Day amongdang tarutsü tajung yangertsü atema tezüngzüktep agidi. Asen Constitution nung lateta aliba ama justice, liberty, equality, aser fraternity tangatetba nung ametdi" ta Governor Ganesan-isa ayongzük.

Mokokchung aser Dimapur nung National Voters' Day mungogo



January 25 nü Mokokchung nung 15buba National Voters Day amungba mapang alaketa jaoker aser Vice Principal Fazl Ali College LS Vinod Kumar, Deputy Commissioner Mokokchung aser tanga ketdangsürtem voter tasentem aser FAC nungi kaketshirtem den tangokba noksa nung angur.

Dimapur, Aenjeti/January 25 (TYO): Linük ajunga den külemi Mokokchung District nunga January 25 nü 'Nothing like voting, I vote for sure' omen nung ajemdaker 15buba National Voters' Day mungogo.

Iba sentong ya District Election office aser Electoral Literacy Club (ELC) Fazl Ali College (FAC), Mokokchung na longjemer Deputy Commissioner Conference Hall, Mokokchung nung agia liasü.

Sentong nung tetushi tejaoker Vice Principal, Fazl Ali College, Mokokchung L.S Vinod Kumar-i o jembiba mapang, vote agütsüsü koda tongtibang iba indang metetdaksütsü asoshi National Voter's Day ya 2011 küm nungi omen balala nung ajemdaker munga arudar, ta ashi.

Taküm omenji 'nothing like voting, I vote for sure' lir aser iba ya linük nung democratic inyakyim tashi itshidaksütsü atema voter tem parnok fundamental rights amshitsü atema ajungmsotsü atema lir, ta pai ashi. Paisa lanurtem ya linük tarutsü lir aser parnoki vote agütsüsü temeden aliba ya koda tongtibang aji angatetsüla ta ashi.

Sentong nungsa Deputy Commissioner, Mokokchung, Thsuvisie Phoji-i, linük democratic inyakyim nung züngoksema aliba voter tem

ajaki yakyaka shilem agitsü ajungshia liasü.

Kasa mapang nung Additional Deputy Commissioner, Mokokchung, Chumlamo Humtsoe-ia, democratic inyakyim ka nung tashiji voter tem kabuma nung lir anungji ajaki iba shilem ya wazüka ayutsü atema tanüker ka shilem agitsüla ta ashi.

Maneni sentong nung FAC nungi Pol. Science kaketshir Sentinaro Jamir-i special presentation ka agütsü. Alakteta jaokeri voter tasentem nem tetushi agüja tenangzüktepba agia liasü. Sentong nungsa DC-i, Mokokchung district nungi BLO 10 nem Best BLOs Award 2025 agüja liasü.

Honibarnüsa DC Conference Hall Dimapur nunga 15buba National Voters Day mungogo. Iba sentong ya Additional Deputy Commissioner, Dimapur Zakabo V. Rotokha lenisüba nung agi aser paisa lokti pela agizükba o jembia liasü.

Pai, voting ya fundamental right ka dang masü saka khuret ka lir, koba ajanga linük tarutsü yanglur, ta ashi. Paisa, voter tem dang parnok ola angashidaksütsü aser tarutsü tajungba ka asoshi teyari agütsüba atema nemadanga bilemetsü ajungshia liasü.

Sentong nung Essay aser Painting tetoktepba nung takok

angurtem nem tetushi agütsü. Essay tetoktepba ya St. John College nungi Imsjungla-i akok aser la sülen Priyanka Dey (Pranab College) aser Alice Awomi (Unity College) na tanabuba aser tasembuba jenjang nung liasü. Painting tetoktepba Unity College nungi Mhayan Lotha-i akok aser Seema Biswas (Pranab College) aser Naiba M. Konyak (Unity College) na tanabuba aser tasembuba jenjang nung liasü.

Maneni sentong nung Best Booth Level Officers (BLOs) tetushi agütsü. Tetushi agizükertem rongnung Khekho Sema (Sematilla, Dimapur I AC), L. Talitemjen (Imkonglenden/Circuit House Colony, Dimapur II AC), aser P. Akhu Kath (Purana Bazar B, Dimapur III AC) nung densema liasü.

Kasa mapang nung Dr. Tinojongshi Chang, NCS, Deputy Commissioner and District Election Officer, Dimapur-i voter tem tenangzüktepba agiba sentong achaayanga agi aser o jembiba mapang vote agiba nung shilem agitsü aser vote shia dak tashi tulu aliba indang lemsatepa liasü.

Sentong ya Chief Election Commissioner, Rajiv Kumar-i osang lemsatepba sayuba sülen tenzüka liasü.

Er.SungtibaAmer-iCAWDinyakyimmetetdaksü

Dimapur, Aenjeti/January 25 (TYO): Assistant Chief Engineer, CAWD, Er. Sungtiba Amer-i osangbenertem den sensaksemba mapang CAWD inyakyim indang metetdaksüogo. Pai ashiba agi, CAWD ya executing agency lir aser iba yagi General Administration kübok kisüjensü mapa ajak achaayanger.

Iba den bendenloksema CAWD yagi, Law & Justice Department, Border Affairs, Village Guard, Election Department, NSO & spill over works of Treasury & Accounts aser CPMF (CRPF) amala Deposit work Departments tem achaayanger.

Pai, Nagaland nung Meluri district densema District Headquarters 17, ADC Headquarters 24, SDO (C) 17 aser EAC Headquarters 65 lir ta ashi. State nung General Administration aser allied department ajak kübok functional aser non-functional building 1588 lir ta ashi.

Paisa, General Administration kanga tongtibangsüa agia CAWD nem taoba küm pezü tsüngda project 30 inyaka tembangsü asoshi sentotsü teperi agütsüba atema Nagaland sorkar aser talisa Chief Minister dang kanga pelaba lemsatep.

Project tem rongnung Phek aser Mokokchung DC office Complex, Tuensang, Phek, Wokha aser Kiphire nung DC Bungalow densema lir aser item dak alia ADC office Complexes, SDO(C) aser EAC Office aser talidak, Kohima nung Chief Secretary indang Residential Conference Hall densema GA Rest House tem takok ngua yanglur lapokogo.

Iba den bendenloksema pai ashiba agi, CAWD-i EAC Headquarters 13 aser ADC Headquarters 1 atema Pre-Engineered Residential Structures 14 yangludar. CAWD-isa, Zunheboto, Tuensang, Noklak, Shamator, Niuland aser Tseminyu nung DC Office Complex yangludar aser Dimapur nunga yakta yanglutsü.

DC Bungalow Mokokchung, ADC office complex Akuluto,

GA Rest House Longleng, ADC Residence Chozuba nung teyangluzüker dang lir aser iba financial year nung tembanga lapoktsü, ta pai ashi. State of the Art Circuit House, Chumoukedima ka asoshi sanction sütsüogo aser 2025 küm February mezüngbuba hopta nungibo tenzüksü. Iba ki ya Sammogooting Stadium Chumoukedima den atonga lir.

Paisa, mezüngbuba stadium yanglutsü atema CAWD nem maongka agütsüba asoshi Nagaland sorkar dang kanga pelaba lemsatep, kechiyong CAWD ya yimya agi General Administration indang functional aser non-functional building tem yanglua anepaluba nung dang shilem agir, ta ashi.

Maneni pai, CAWD-i Wokha, Tuensang aser Zunheboto District Court aser Mon o Mokokchung na nung Judicial Officers Flat yanglua lapoktsüba indang metetdaksü. Thizama nung Village Guard Rest house, Longleng nung District Jail aser Kohima nung Nagaland Olympic Association Office Complex ajak CAWD-i yanglutsüogo, ta ashi.

Ano CAWD-i, Kohima nung Law Officers atema Flat Type Quarters aser Meriema nung Border Affairs atema Flat Type Officers aser Staff Quarter yangludar. CAWD-i tang mezüngbuba Tuensang nung Village Guard Commandant Office aser Sangphur, Shamator nung Village Guard Training Centre yangludar. CAWD-i, district ajak amai nung Election Department indang EVM's aser VVPAT's warehouse yanglutsüogo. CAWD-isa, state ajunga nung CPMF (CRPF) center tem indang semi-permanent aser temporary structure tem yanglua aser anepalua arudar, ta pai metetdaksü.

Tatem nung pai, state terenlok atema General Administration aser allied Department tem nem tenüngdakba infrastructure agütsütsü asoshi sorkari kanga tongtibangsüa inyakba indang metetdaksütsü asoshi media den iba osang ya lemsateper ta ashi.

**GOVERNMENT OF NAGALAND
HOME DEPARTMENT:: POLICE 'B' BRANCH**

NO.POL-B/SWR/ESTT/1/2/20(Pt)

Dated Kohima, the 23rd Jan' 2025

CORRIGENDUM & ADDENDUM

1. With reference to Government of Nagaland Home Department: Police 'B' Branch, PRESS RELEASE / ADVERTISEMENT bearing No. POL-B/ SWR/ ESTT/ 1/2/20(Pt) dated Kohima 20.01.2025; the following Corrigendum & Addendum is made:

(a) Corrigendum:

For

SI No. (8) & (9), "Requisite rank held in the Army or equivalent rank in Navy & Air Force: JCO/ NCO (Gen Duty) and their equivalent in the Navy and Air Force".

Read As

SI No. (8) & (9), "Requisite rank held in the Army or equivalent rank in Navy & Air Force: NCO/ OR and their equivalent in the Navy and Air Force".

(b) Addendum : Widows/ dependants of ESM may apply for Class III & IV (Non-Gazetted) posts at SI No. 2 to 9. Their selection would be governed by Rule as per Directorate of Sainik Welfare & Resettlement, Government of Nagaland letter No. HOME/SSA/8/81(Pt) dated 29 Feb 2016.



Honibarnü DC Conference Hall Tuensang nung DC & DEO Tuensang, Lithrongla Tongpi Rutsa den Akashvani Kohima nungi ketdangsürtem aser National Voters Day nung shilem agirtem tangokba noksa nung angur.



January 25, 2025 nü Rashtrapati Bhavan, New Delhi nung Tir, Droupadi Murmu aser Ato kilonser Narendra Modi nati Indonesia Tir Prabowo Subianto agizükdang tangokba noksa nung angur. Amongnü Republic Day sentong nung Subianto tongti tejaoker asütsü.

India aser Indonesia nati tezüngzüktep pongu agiogo

New Delhi, Aenjeti/January 25 (Agencies): Honibarnü

India aser Indonesia nati defence manufacturing aser supply chains atema amalitepa inyaksü aser tzüym nung security tsütsü amalitepa inyaksü atema bangjemogo.

Ato kilonser, Narendra Modi-i, Southeast Asian linük (Indonesia) ya Indo-Pacific nung India atema tongtibang partner ka lir, ta ashi.

New Delhi nung Modi aser Indonesia Tir, Prabowo Subianto na senden amenba sülen linük anati health, tzüym nung security, sobaliba aser digital space tsütsü amalitepa inyaksü atema tezüngzüktep pongu agi.

Osangbenertem den jembidang Modi-i, linük anapronglai region nung yimjung, security aser temzüng kübok alitsü atema inyaksü, ta metetdaksü.

China sepaitemi South China Sea aser Indo-Pacific nung ambangyima inyakba mapang ka nung India aser Indonesia nati iba tezüngzüktep agi.

Ato kilonser Modi-i, linük anati tzüym nung security, cyber security aser kiralongra anema raraba tsütsü amalitepa inyaksü, ta metetdaksü.

Indonesia Tir Subianto Brihostibar aonung India tonga aru. Amongnü Republic Day anogomong sentong nung pa tongti tesemdang asütsü.

Subianto-i, Indonesia atema India den partner yangluba ya kanga tongtibang, ta ashiba den külemi pai ketdangsertem dang linük ana tsüngda shishilembaba jenjang tajungba akümtsü atema inyakang ta tuyuogo, ta metetdaksü.

Modi-i, linük anapronglai maneni FinTech, Artificial Intelligence, Internet of Things aser digital public infrastructure

tsütsü amalitepa inyaksü bangjemogo, ta metetdaksü.

"ASEAN (Association of Southeast Asian Nations) aser Indo-Pacific region nung Indonesia ya asenok atema tongtibang partner ka," ta pai metetdaksü.

"Defence sector nung amalitep jenjang tajungba akümtsü atema onoki defence manufacturing aser supply chain atema longjemer inyaksü telemtetba agiogo," ta paisa metetdaksü.

"Tesüiba küm ishika tsüngda linük ana tsüngda shishilembaba jenjang kanga junga kümogo. Yaküm linük ana tsüngda shishilembabaji US dollar sen billion 30 liasü," ta pai ashi.

Republic Day tongti sentong nung Subianto tongti tesemdang asüba dang masü saka Indonesia nungi sepai 352-ia Republic Day parade nung shilem agitsü.

Delhi assembly election atema BJP-i manifesto tasembuba saya

New Delhi, January 25 (Agencies): Delhi assembly

election atema Honibarnü Union Home Minister, Amit Shah-i Bharatiya Janata Party's (BJP) manifesto tasembuba sayaogo.

Shah-i, BJP-i election nung takok ngura Delhi nung tang aliba scheme kecha manentsütsü saka tajungba dang benoka inyaksü, ta ashi.

Manifesto sayaba sentong nung Shah-i, Delhi nung BJP-i takok ngura pei sasa mapa inyaktetsüsa onoki maangka agütsütsü aser sorkar mapa nung

nisung 50,000 anioktsü, ta metetdaksü.

BJP-isa, unauthorised colony 1,700 nung nüburtem nem kibur temeden agütsütsü, ali ayoktsü, alizüktü aser kiojen asütsü atema temeden agütsütsü, ta nangzük.

BJP-i takok ngura küm asem tsüngda Yamuna ayong merütktetsü, ta nangzük.

Amit Shah-i, BJP-i takok ngura mezüngbuba cabinet senden nungsa Ayushman Bharat scheme mapa küma benoktsü atema agizüktütsü, ta metetdaksü.

Delhi nung AAP sorkar aija

Shah-i, BJP indang manifesto yabo tazüngla tenangzükbatem masü saka Delhi nung atangji inyaksü telemtetba agibatem lir, ta ashi.

Delhi nung Ato kilonser Narendra Modi-i aniba sorkari gari lenmang yangluba nung sen crore 41,000 indok, railway yangluba nung sen crore 15,000 indok aser airport yangluba nung sen crore 21,000 indokogo, ta paisa metetdaksü.

Delhi nung February 5 nü assembly election agitsü aser February 8 nü vote azüngtsü.

AAP indang ochimashirtem poster nung Rahul Gandhi densema lir

New Delhi, January 25 (Agencies): Honibarnü Aam

Aadmi Party (AAP)-i ochimashi lenirtem indang poster ka saya aser iba nungji Ato kilonser Narendra Modi aser Home Minister Amit Shah nata densema lir, ajisüaka iba poster nungji opposition INDIA teloktem nung lenir, Rahul Gandhi-a densema liasü.

Iba poster nung Congress lenir Rahul Gandhi-a züngsemba atema AAP aija Congress lenir Alka Lamba-i AAP tongti lenir (Arvind Kejriwal) dang, na tatsütait süra nai INDIA teloktep toktsütsüla, ta ashi.

Laisa, 2024 Lok Sabha election mapang nung Kejriwal-i Congress dang opposition teloktep ka tentetsü mepishia liasü, ta ashi.

Delhi nung Kalkaji assembly menden nungi Congress candidate, Alka Lamba-i, "Arvind Kejriwal tasütait süra pai INDIA teloktep toktsütsü, ta sangdongtsüla. Congress Party nungi MP 100 lir aser tashi itta lir. BJP nem menden 7 prongla (Delhi nung) agütsübaji Arvind Kejriwal lir. Lok Sabha election mapang nung teloktep ka tentetsü atema onok dang mepishibaji na (Arvind Kejriwal) lir. Delhi nung menden tenet atema ner party den loktepba ajanga Congress-i aibelen tuluka inyak. Ibaji ajanga Congress-i takoksa kanga angu," ta ashi.

AAP indang ochimashirtem poster nungjisa Congress nungi Sandeep Dikshit aser Ajay Maken na, BJP lenirtem- Yogi Adityanath, Anurag Thakur, Virendra Sachdeva, Parvesh Verma aser Ramesh Bidhuri nunger densema lir.

AAP national convener, Arvind Kejriwal ya ochishir, ta parnoki metetdaksü.

"Item ochimashir ajak matsüngdang Kejriwal ochii takok angutsü," ta poster nungji zülua lir.

Congress party telung nung mangatettep aliba ajanga AAP den tesendaktep raksago.

AAP-i, Congress-i Kejriwal aitsüba ajanga BJP dang ajanzükter, ta metetdaksü.

Congress party otongdar, Jairam Ramesh-i, "BJP aser AAP na ya ka dang. Parnok tsüngda tepila kecha mali. Onoki iba election nung AAP aser BJP na anema rarar. AAP ya BJP indang team B lir. AAP aser BJP tsüngda tesendaktep lir. Anna Hazare moment ya shibai tenzük? Kechi ajanga parnok ajungmeso? Iba nung ya RSS densema lir," ta ashi.

Opposition INDIA teloktep nung telemsa adoka aliba ajanga Delhi nung Congress jenjang majunger, talisa Mamata Banerjee-i aniba Trinamool Congress aser Akhilesh Yadav-i aniba Samajwadi Party ama regional party temi AAP pusemba ajanga Congress jenjang mejungi lir.

Haryana nung BSP lenir Harbilas Singh khaset



Ajichilen noksa nung Harbilas Singh Rajjumajra angur

New Delhi, January 25 (Agencies): Hokolbar

nikongdang Haryana kübok Naraingarh nung nisung kari Bahujan Samaj Party (BSP) lenir, Harbilas Singh Rajjumajra dak injang khaloktsüba sülen pa mekümzükteki ayaterm nung süogo, ta osang ka ajanga metetdaksü.

Tang tashi pa dak injang khaloktsürtem maitsüji mejangjar.

BSP lenir Singh den Puneet aser Gugal nunger pa meyong gari nung toudak mapang nung kari parnok dak injang khaloktsü. Iba tatalokba nung Puneet-a injang agi yiru.

Iba tatalokba sülen Singh aser Puneet na PGIMER, Chandigarh-i anir oa yari ajisüaka Singh bo mekümzükteki süogo.

BSP-i sangdong ka ajanga, "Mejangjaba nisung kari injang amshia BSP Haryana State Secretary, Harbilas Rajjumajra amakba sülen pa süogo. Haryana administration-i iba tatalokba kuli bushitsüla aser aibelenertem nem temerenshi agütsütsüla," ta metetdaksü.

BSP Haryana unit-i X ajanga, "Bahujan Samaj Party Haryana state secretary aser taoba mapang Naraingarh nung candidate, Harbilas Rajjumajra khasetogo. Pa den külemi alirtem mejungi yirua lir. Chief Minister @NayabSainiBJP, @cmohry, @police haryana-i tekeraba nung aibelenertemji aputsüla," ta takhangba agütsü.

Singh ya taküm Haryana assembly elections nung Naraingarh menden nung candidate liasü.



January 25, 2025 nü Mumbai kübok Goregaon kiyong nung furniture market ka arongdang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, JANUARY (AENJETI) 26, 2025

Chichiba Tsüngrem tembar

Tanü ama alima tejakleni aoba putu ka nung asenok lisem dang asenoki kanga junga shisadangra alima ya lenmang aika nung tejakleni kanga ogo. Tanü asüngbo jajaba nungi tenzüker osangtsüsang aser nungdak balala ajak mopung nung dang abener. Mopung nung abenba tetezüji nungdak balala ajak tekaratiba nung nukjidong atongtsü atema. Yangi tatishitsü ka ashir dangashi tanü lima nung kechisarena ajak yamaji renloka tejakleni oa lir. Tanü asüng alima tejakleni aoba denji apaktepa ano tamajunglena yamaji temenen temai jateta adoka lir. Alemlia alima tejakleni yamai mao asü dangbo mapa tamajung inyaksübjaja lenmang apara liasü, kechiyong azümesenertem chiyim dak tesem tezüngtet dang liasü, saka tanü asüngbo alima renlokba ajanga ano mapa tamajung inyaka temenen lenmang nung jajatsü bilemertem atemabo lenmang aisü nung kanga tezüba kümogo. Kumdanga aser saksalema melira, temeshi laishiba Apijemtsü Shin kaket nung ashiba ama, nisung tsüng dang shitak mesükba lenmang lir, saka iba tatembangji tasüba ta asüba lenmang to tanü asüng asenok jak dang aika angur. Anungji koba lenmangi ao nungang Tsüngremi mulungba asütsü ta shisadanga tamanger shia anogoshia jajatsübjaji nungdaker. Aji oda mesürabang tenük masepshi nung temenen nem kinükleni atsür idaktsütsü, mesüra tamangerji temenen nung asonger alitsü. Kechiaser lenmang tai ser nung shitakba mesüka ngudaktsütsübjaji temeneni mapa inyaker. Temenen ya kanga dang tesangra, pai Tsüngrem mekokakasa pa daka ain keta lir. Anungji temeneni iba ainji amshia Tsüngremi santem mesüzüka anir aotsü anogoshia meranger. Tanü asüng ya balaka taoba tesem ajaklen tatidang agi sünga lir, anungji mapang ajak nung pei taküm mita alitsütsüla. Yisu sülen anidakertem ajaki meteta alitsüba kaji, mapang ajak nung saksalema alitsü merangakasa memeteti temenen nem mesüzükdaktsür alir nung, oda anüalema dang lirabang parnok kolak nungjibo anogoshia mojing tsüngsanga chubatsü. Anungji temenen nem mokokdaktsütsü atema amangbapurtem ajak anogoshia pei tamang mita alitsüla. Laishiba nung Tsüngrem dak chichia amanger nisung aika lir; Tsüngrem tembar Noa o Abraham ama alitsübjaji Yisui akhanger. Laishibai ashir: "Aser tzümetsüng nungi jenbuttsü Noa rongi ai, aser pa den pa chirtem, aser tebuttsü, aser pa chir kibutsütem ai. Aser tzümetsüngji alima nung lirnü liasü; aser tzüji tali aküm aser rongji punga atu, aser ibaji ali nungi ajungketa atu. Aser tzümetsüngji tashi ita, alima nung kanga tali aküm; aser rongji tzü manung pungdak." Lipok 7:7; 17 & 18. Tanü ama putu nung asenok lia aodang, Noa ama pei tamang agi kibong ajak kumzüktettsüsa asenok anogoshia Pa den tesendaktep shitak lia, Tsüngrem tembar süa litettsübjaji tensa tia-i akhanger. Ano Abraham-ia mapang ajak nung Kibuba lenmang nung jaja, iba jagi Pa dang Tsüngrem tembar ta aja. Laishibai ashir: "Aser Abrahami Tsüngrem dak amang aser pa atema aji temeshiba ama züngshi; koba laii ya ashir aji atalok; aser pa dang Tsüngrem tembar ta aja. Tamang agi dang masü, saka mapa agi nisung metendaktsür ta nenoki angur... kechiyong kechi koda tanela meteni tamang tasü; aji oda mapa meteni tamanga tasü. Yakob 2:23-27. Asenoki tebang agi o aika jembitsüa akok, saka mapa agi inyaka mesayutetra ibaji yongmen yin takoshiba ola ka dang mesüka alitsü aser asen taküm yimya aser libaliro nung pur medemsortemi Yisu mangutsü. Mapang ajak nung Pai mulungba lenmang nung jaja nung dang asenok dang Tsüngrem tembar ta ajatsü; asenok atangjibala Tsüngrem tembar kumtet nung dang tangari asen dak Yisu angutsü.

OLEMSABANG

AROGO NUNG SHIBA KIBUR?

~ Wati Longchar (Eralibill)

YSS sensaksem ka nung sabangpur kati tanü Ao arogo nung nungdakba kaji "'Clergy-centred' nungi 'Congregational-centred' dangi meyiptsü nungdak" olen ka shioktsü. Tanü Ao Mungdang/ arogo ya clergy-centred kuma aor asü ta tasüng dang ka nung tebilemba balala aika lemsatep. (Iba ocet nung 'clergy' ta asüba ya "Pastor" ta amshir, saka toklang tenzüker ajak dena lir ta bilema züngdaktsüner) Kari ashi, ABAM Executive Council akümba yimya yagi clergy-centred ta sayur. Tat. agi, ABAM President Pastor dang agir aser members rongnung 70% shi pastors. Iba yagi ABAM ya Pastors' Association amai dang kümogo ta sayur. Ano kari ashi, ABAM aser arogo nung lay leaders kanga ajema akümer. Anungji Baptist distinctive, "Tamanger ajak putir" ta noktakba nungi tera pilaa aor. Akhi putu Baptist arogo nung tetsür, tebur, sensaker ta kecha melemsai shilem agia aru, saka tanü Ao lima arogo tebur arogo amai dang kümogo. Tetsür pastor mali, arogo kar nung tetsür ka-ana shimokba dak alaka arogo aika nung tetsür deacon mali. Ao arogo ya male clergy-centred church kuma aor asü masü? Lai tesayuba dak ajemdaker arogo ya nuburtemi akümba arogo aser parnok Tsüngrem O agi mesutsü Pastor ya shimteter. Anungji nuburtem/arogo (employer) aser Pastor (employee) liromedema telemtetba agiba Komite ajak nung alitsüla aser yamaji arogo lenisuba bener aotsüla.

Deacon shimdang tashi mait kar lemsatep. Baptist Arogo nung deacon menden ya kanga tongtibang kechiaser arogo ka nung sendakba ketdangsuba ajak deacon menden nung telemtetba agi. Anungji ochishir, Khrista metetba taküm aser lokti bendanga agüja tenzüksüba pur nungdak. Tzükong, yim, kiyong, kidong aser takar isab nung shimra, arogo ochi kuli samatsü. Tanü nuburtemi Pastor-centred ta ashibaji telemtetba ajak pastori mulungba isab nung dang arogo aika anir aor kechiaser tenzüker aika Pastor bilemba nung hau ta asütsü pur dang repranga shimba angur. Kari ashi, "Pa/la ya kü kubok litettsüa, pa/la tazüngba kü den tilaba, pa/la sempet kü den tera teküpokba, pa/la aniokra nuburi nisa tushitsü aser külemtsü, pa/la dak ni ama tanela sempet maket, pa/la aitra ola madoktsü, pa/la lira kü o dang teti agitsü, a.a Anungji iba ama arogoji clergy-centric kuma aor. Baptist arogo nung deacon shimba yimya ka khen reprangshitsü nungdak. Kokra Deacon shimdang toklang tenzüker tebang maitsüa aser matentsüla kechiaser itaki politics aikasa asayar ta tebilemba lemsatep.

Sen ajanga mapa aika inyakteter, saka ter shilem aser amangbapur nuksu tenla ochi shia ketdang mesura, nuburtemi arogo dak tamang makatettsü. Lim arogo kar nung rongsen tali akaba ajanga Mungdangi lemtetba hau ta maliba, arogo tului kechi ashir ibaji atsünga telemtetba agiba ajanga arogo/Mungdang tashi mait akümer ta metettsüla. Yamaji meinyakra budget magütsütsü ta jembiba tashi lir. Ita sen rural aser urban tepila ajanga arogo kar "inferior" aser kar "superior" ta reprangba/bilemba ataloka arur. Ibaji ajanga clergy-centred church ta dang masü "urban-clergy-control-church" akümtsü mapang kati arutsü. Yongji equitable resource sharing ya koda sur arogo nung bener arutettsü Mungdangi shisadangtsüla.

Taoba mapang Putir sobutsü indang YSS nung lemsatepogo. Baptist arogo Putir sobutsü magitsü nokdangbaji clergy-centred inyakyim anema lir. Asen tetsü-tebou mapang kin-kidong sobutsü bentet-benteta ayuba ama, Tejen aser Tasen Lai putu nunga Sobutsü ya kanga benteta amshi. Chuba, chubatsür, takar, putir süoshi sentsü aser quality balala aben aser parnoki sobubatemi sensakeri sobutsü memela; tsüngsema sensakeri asemtsü memela. Süoshi aser tsüngsem ya symbol of power, status tsütsü amshi. "Alar" yabo category balaka nung amshi. Parnokbo sentsü tanak (Ao o nung anemsü ta meyipzüka angur) dang abendaktsü. Süoshi jagi shirnok alar aji sayu. Alar süoshiji kecha style mali pungdang amai dang, aser teberem nung lisü agi alener mapa inyak. Kechiba lisüji amshi ta süra (a) nungdakang khu alena bener aotsü (b) tashi mangar dak iba lisü jagi areptsü (c) onsara tashi mangara iba lisü jagi alener ayu. Anungji alartemi teberem nung belt enokba amai alenloker mapa inyak.

Anungji Tasen Lai nung Khrista lar ta asüba iba concept nungi adok. Yisui ni tenzükdaktsütsü masü saka tenzüksü aru ta asüba yaa iba background nung angatettsüla. Arogo ya power-centred masü, alar ama tenzüksü jatetba telok ka. Laishiba nung arogo ya "people-centred" talisa jendoka aliba pur tenzüksü aser temenen pur tekümtet leman dang anitsü jatet ta metetdi.

Arogo lanu (early church) rishikangshiba putu nung nütsüngtemi aser tamanger teloki alari ama temesüng süoshi abenba angur. Khrista züi alangzüka temaitsü, temeshi, Khrista lar, aser tepsetnera tepsetang ta teka-tetsüng alener tasü ita ataba aser Shia aruba Khrista kuli asüba tasü tait mapa kuli tangatetba nung putir sobutsü ya amshi. Yamaji Yisu Khrista nütsüng karbo parnoki bona aliba lisü agi tsüngseta südaktsüba otsü nung azünger. Anungji original concept ya kanga tetezü tarok akaba ka lir. Saka lia lia puti sobutsü ya misuse asü, it became a symbol of power and hierarchy. Putir sü abeneri dang sarasadem asütsü akok, Lai azüngtsü aser ratettsütsü akok ta Lai tiyazü ratetja putirtem takar, capitalist, feudal lords, political power, nüktapangta, machi-majemtsü lar akümba, sensaker hau ta mali temenen jendi jateta adok. Sen agi putir menden alitep kechiaser putirtemi lokti nung tashi tulu amshi. Anungji Reformation mapang putir inyakyim anema apuso aser parnoki Lai dak ajemdaker "Priesthood of all believers" sayu. Tamanger ajak putir ka ka anungji Putir subotsü mabentsü sayu. Tamangertem Yisu Khristai züi alangzükogo, Khrista dak amangba ajanga tekümtet, Laishibai sayuba beshiba agi tekümtet, putir ajanga dang masü amangba pur ajaki sarasademtsü akok, Khrista kuli asütsü akok ta apusoa putir süoshi shisar mi nung rongdok. Yamaji lia aruba ajanga Baptisti tanü tashi putir sobutsü mesobur, "clergy-centred" church masü "congregational-centred" church ta ajar aser iba inyakyim beshir. Ao arogotem "clergy-centred" church atsünga oya lira kumdangshidi ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Albania Orthodox Arogo nung tongti putir Anastasios süogo



2017 kum September 21 nü Albanian Orthodox Arogo nung tongti, Anastasios nem "Honorary Citizen" award agütsüdang tangokba noksa nung angur.

January 25, 2025: Tan ita tejaklen Albanian Orthodox Arogo nung tongti, Anastasios temang mejungi treatment agitsü atema tayimtsü ajanga Athens-i anir oa liasü, ajisüaka pa temang tamajungba kuma alima nungi pilaogo; pa arrshi kum 95 liasü.

Muslim nütsüing teimba aliba Albania nung Orthodox Arogo asentenshüsangji Archbishop Anastasios lir, ta züingshir. Kum 30 dak tali pa Albania Orthodox Church nung tongti liasü.

January 25, 2025 nü Arogoi pa alima nungi pilaba osang lemsatop.

Tirana nung aliba hospital ka nung pa anogo pezünü treatment agiba sülen tayimtsü ka ajanga Greek yimtiba, Athens-i anir ao. Pa mongpu wara agi shiranga liasü.

Athens nung aliba Evangelismos Hospital ketdangsertemi, pa temang nung telen aikati mapa meinyaki akümba sülen süadok, ta metetdaksü.

Anastasios ya Greek nunger lir. Tesüiba kum ishika pa mapang shia Athens nung medical treatment agia aruogo.

2020 kum November ita nunga pa coronavirus agi shiranga Athens nung aliba hospital nung anogo 12 monga liasü.

Archbishop Anastasios ya Athens anasa Piraeus nung aso. Pa dak nisung puatsüsa sempet lir, jembishinü tajung aser o anep-asünga jembiba lenir ka liasü.

Sudan nung sepaitemi Khristan tenet pua reshikangshi

January 25, 2025: January 14, 2024 nü Sudan Armed Forces (SAF) intelligence agents-i Shendi nung Khristan tenet pua reshikangshi.

Shendi ya Khartoum yimti nungi kilometer 150 shi pilar lir.

Sudanese Church of Christ nung züngsemtemi Khartoum nung rara nungi jenbutüsü atema SAF amenoka aliba tesem nung tejenokdak asüngdanga liasü, ajisüaka parnok Shendi tonga aruba mapang nung Military Intelligence (MI)-i apu, ta Sudanese Christian Youth Union-i metetdaksü.

MI agent temi, Khristantem jagi paramilitary Rapid Support Forces (RSF) sepaitem pusemer aser parnoki sen auyaogo, ta tai tongloksü.

Sudanese Christian Youth Union-i, Khristantem aputsü atema tiyazü nung tai tongloksü aser sepaitem jagi Khristantem dang 'nenoki aibelenogo' ta nangzükang, ta shia reshikangshi.

Khristantem atema ken o jembitsür, Shinbago Mugaddam-i, Khristan lanur tenet nemji legal teyari magütsü aser kasa anogo nungjisa ken o angadanga parnok reshikangshi, ta metetdaksü.

Mugaddam-i, "Army intelligence-i parnok apuba sülen parnok dak züka asüngdangya. Parnok anema ken o benok aser kuli agütsürtemji armed forces nung züngsemtem dang liasü. Court-i Khristantem dangji nenoki lawyer nungdaker asü menüngdaker, mesüra nenok

pusemtsü atema kulisürtem lir asü mali?, ta masüngdang. Parnok dak azük aser kangshia aibelen nangzükdaksütsü merang," ta metetdaksü.

Khristantem nem tai tongloksürtem aser kulisürtemji ajak Military Intelligence nungi liasü.

"Sudanese Criminal Code of 1994 nung Arrla kübok lanurtem anema ken o angadang. Iba Arrla ya auyaba dak sendakba arrla lir. Shendi Court, River Nile state nung parnok anema ken o angadanga liasü," ta Mugaddam-i ashi.

Sudanese Christian Youth Union-i iba tatalokba aitsüba den külemi tangsa Khristan lanurtemji chiokang, ta takhangba agütsüogo.

Union-i, kuli kecha makai Khristan lanurtem apubaji Sudan nung meimchir temeden aser yimsü temeden alema lir, anungji parnok kumzüksü atema regional aser international organizations nem inyakdaksüner, ta mepishia metetdaksü.

January 21 nü Union-i sangdong ka ajanga, "Tamangba yimsü, sentsü aser kin nung ajemdaker aibelenbaji Sudanese Christian Youth Union-i sashia aitsür," ta metetdaksü.

Sudan nung General Intelligence Service (GIS) Law (2024 Amendment) ozüing ajanga nisung jaoka asüngdangyatsü, mita aotsü, pua ayutsü aser kiojen aputsü atema Intelligence officers nem tashi agüja lir.

Alima nung Khristantem alitsü atema linük tamajungtiba 50 rongnung Sudan ya jenjang 5buba nung lir (Open Doors' 2025 World Watch List (WWL). Tesüiba kum nungbo Sudan jenjang 8buba nung liasü saka tang tamajungba kumogo.

Sudan nung 2023 kum April ita nung civil war tenzükba sülen Khristantem tepsetba, tashiyim amshia raksatsüba aser Khristantem meyong kiojen raksatsüba kanga bulua kumogo, ta Open Doors' 2025 World Watch List report ajanga metetdaksü.

"Sudan nung Khristantem kanga timtemdar aser linük nungi jena mouteter. Tenla kitem poksatsür, Tenla kidang nungi auyar aser sepaitemi Tenla kitem ji camp ama amshir," ta kasa report ajanga metetdaksü.

2023 kum April ita nungi tenzükba paramilitary RSF aser SAF sepaitem tsüngda rarar aser iba rara ajanga Khristantem aikati pei ki toksür jenshiogo.

2019 kum U.S. State Department-i yimsü temeden anema inyakba linüktem-Countries of Particular Concern (CPC) nungi agiener World Watch list nung züngoka liasü.

1999 kum nungi 2018 kum tashi Sudan ya CPC list nung liasü. 2020 kum December ita nung State Department-i Special Watch List nungi Sudan agien.

Sudan nung nütsüing million 43 lir aser iba nungjagi million 2 dang Khristantem lir.

ANOGO ABEN TSÜNGREM DEN

TAMANG NUNG AKANGA LIANG

"Saksalema liang, Tamang nung akanga noktakang. Teburchi ama tasü itang Tashi itang." 1 Korint 16:13

Tenyar Pauli Korint nung aliba amangbapur dang parnok tamang nung akanga saksalema noktaksü indang ashiba asenoki iba shiti nung angur, kechiyong par putu nung Korint aser iba temeket nung aliba Yimten nung teyazü tesayuba bulua adokba mapang ka liasü, ibayongji Pauli-i amangbapurtem dang tamang nung saksalema alitsü iba shiti ajanga ajungshi.

Asenok tanü Z Hi-tech Global village generation ka nung alir, tetezü advance technology ajanga alima rangben sentakteper yimtsüing ka nung nisung ajak alir ama liteper. Yamaji iba advance putu ya asenok asoshi tajangzük aser takoksa anaprongla ajurur. Alima kara aoba ama tamangbarena tekarakba nung aoer Yamaji teyazü tesayuba balala agi asen lima süngogo. Aser item teyazü tesayuba aser inyakyim agi asenok dangi makmakshimaka ase tebenja jenti bener arutsür. Iba ama tia tensa nung asen tamang nung akang akanga melira mashileni mesüzüka aotsü meteta mali. Anungji Khritsa dak amangbapur ajaki Lai O nung tera yanga anogoshia Tsüngrem den tamang takang yua jajatsü iba zülü ajanga ajungshir.

Boko Haram-i amakba ajanga Khristan 4,000dak tali jenshiogo

January 25, 2025: Tawa Boko Haram kiralongrar teloki Nigeria kübok Borno state nung Khristan yimtsüingtem amakba ajanga Khristan 4,000 dak tali jenshiogo, ta International Christian Concern (ICC)-i metetdaksü.

Boko Haram teloki Khristan yimtsüingtem- Njila, Banziir, Shikarkir aser Yirmirmug amakdang Tenla kitem densema ki aika rongdoktsü aser Khristan pongu tepset.

Tang tesüsa Hombarnü (January 20) kiralongrartemi Shikarkir aser Yirmirmug yim na amakba ajanga yangji alir Khristan 1500 dak tali jenshiogo.

Tenük kuli alirtemi ashiba agi, Boko Haram teloki yimtsüingtem mita aodang Khristantem dang Islam yimsü dangi meyipang, mesüra nenok tepsettsü, ta amokmerena liasü.

Kiralongrartem jagi Ekklesiyar Yan'uwa Tenla ki rongdoktsü, kisetshiruru aika tepset aser rizünga aliba chiyungtsü raksatsü.

Shikarkir yimdam nungi jena aoer aluyimer kati, "Onok tetsübu nung dang alir. Parnoki ozü Arogo Tenla ki den ki aika rongdoktsüogo," ta metetdaksü.

'Jama'atu Ahlis Sunna Lidda'awati wal-Jihad' ta official tenüing amshiba Boko Haram teloki Islamic yimli amenoktsü nükjidong nung 2009 kum nungi tenzükba Khristantem aser sorkar rejutem anema inyaker.

2014 kum Boko Haram teloki Chibok nung school azünger tetsür 276 puer aoba sülen linük aikati iba telok aija liasü. Iba mapang nungjagi tenzükba Boko Haram teloki civilian meyirjang aika tepsetogo, kiojen jenti rongdoktsüogo aser nisung million 2.5 dak tali jenshiogo.

Parnokisa Tenla kitem, schools aser yimtsüing aika rongdoktsüogo.

Tesüiba kum ishika tsüngda parnoki Khristantem tekülem sentong tagidak mapang nung amakba aser Tenla kitem rongdoktsüba kanga bulua kumogo.

Borno State nung Governor, Babagana Umara Zulum-i tawa tatalokbatem aitsüba den külemi security dak sendakba telemetba kar agitsü, ta nangzükogo.

"Tarutsü nungbo item ama tatalokba nokdangtsü atema sorkari meranga inyaksü," ta pai metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimiyim

Tebouren

(n) tebur yimsü aser yimli (patriarchy)

* Ao yimli nung tebouren nungi sentsü-senmang ajak amanger.

Tebu

(n) chirnur aliba nisung, obala (father)

* Onok tebu ka chir jabaso pezü liasü.

OLONG PAITEP # 7046

	1		2			3		4		5
6								7		
					8		9			
			10							
11										
				12						
13		14		15						16
17										18

TIPLIN

1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S _____ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. ____ hi - (3)
16. Akümlü nungi pilar - (3)

OLONG PAITEP # 7045 TELANGZÜBA**TIPLIN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiooktsü,
5. Lenti, 7. Tajangzük, 11. teronem,
12. Sempa, 13. Jahaz.

NAI-A YA METETTER MA

German nungger aerospace engineer Rudiger Koch-i "longest time living under water without depressurisation" otsü tasen yanglutetogo. Arishi küm 59 tain Rudiger-i Panama nung submerged capsule ka nung anogo 120 among aser iba atema Guinness World Records adjudicator Susana Reyes-i pa nem kulikaket ka agütsüogo.

Taoba nung America nungger Joseph Dituri-i Florida lagoon nung underwater lodge ka nung anogo 100 amongba atema alima otsü yangluteta liasü saka ibaji Rudiger-i ajatetogo.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimiyim bureau tem nung agüjang.



Programme for Celebration of
76TH REPUBLIC DAY 2025
AT NAGALAND CIVIL SECRETARIAT PLAZA, KOHIMA



0600 hrs : Unfurling of National Flag in all Government Offices, Institutions/Public & Private Buildings.

0850 hrs : Review of Parade by DGP, Nagaland.

0900 hrs : 1. **Hon'ble Governor** arrives, unfurls the National Flag, receives Rashtriya Salute and inspects the Parade.

2. Address by the Hon'ble Governor.

3. Presentation of Awards.

4. March Past.

Parade Contingents:

- a. 13 Assam Rifles Bn
- b. 78 CRPF Bn
- c. 37 BSF Bn
- d. Arunachal Pradesh Police
- e. DEF Kohima
- f. 4th NAP Bn
- g. 10th NAP (IR) Bn
- h. 15th NAP (IR) Mahila Bn
- i. Home Guards, Civil Defence & SDRF
- j. Ex-Servicemen
- k. NCC (Boys)
- l. NCC (Girls)
- m. Bharat Scouts & Guides
- n. 13 Assam Rifles Bn Pipe Band
- o. Nagaland Police Brass Band, PTS
- p. 15th NAP(IR) Mahila Bn Pipe Band
- q. Nagaland Police Auxiliary Brass Band

Parade Commander : Shri, Limaonen, NPS
Dy. Commandant, 4th NAP Bn Thizama
2nd in-Command : Km. Sara Tokiu, NPS
Dy.SP (Probationer)

5. ENTERTAINMENT

- a. Special Presentation : 'Medley' (Bright Lights, Dimapur)
- b. Dance Performance : "Vande Mataram"(Women Resource Deptt)
- c. Display : Taekwondo (Youth Resources & Sports)

6. CULTURAL PRESENTATION

- a. Angami Cultural Troupe : Cultural Dance
- b. Ao Cultural Troupe : Cultural Dance
- c. Konyak Cultural Troupe : Cultural Dance
- d. Rengma Cultural Troupe : Indigenous Game
- e. Sangtam Cultural Troupe : Cultural Dance
- f. Zeliang Cultural Troupe : Cultural Dance

7. HON'BLE GOVERNOR TO FLAG-OFF CHIEF MINISTER'S MOBILE OPERATION THEATRE**8. INAUGURATION OF EXHIBITION STALLS BY THE HON'BLE GOVERNOR****9. DISTRIBUTION OF SWEETS AT PARADE GROUND BY DOBASHIS OF DC OFFICE, KOHIMA****VISIT OF INSTITUTIONS BY CHARITABLE ORGANIZATIONS**

1. State Mental Health Institute : Gorkha Public Panchayat
2. Tabitha Enabling Academy : Puliebadze Club
3. Old Age Home : Indian Red Cross
4. Kohima Orphanage & Destitute Home : Masjid Committee
5. District Jail : Nagaland Contractors & Suppliers Union
6. Bright Morning Star Orphanage Periezie : Kohima Chamber of Commerce & Industry
7. Cherry Blossom : Angami Women Organization
8. Jo Foundation : Rotary Club
9. Cradle Ridge : Classic Club

EVENING PROGRAMME AT SECRETARIAT PLAZA

1430 hrs : Football Exhibition Match: Aztecs Vrs Zhadima Youth

1600 hrs : Prize Distribution

1615 hrs : Band Display

1. 13 Assam Rifles Pipe Band
2. Nagaland Police Brass Band, PTS
3. 15th NAP (IR) Mahila Pipe Band
4. Nagaland Police Auxiliary Brass Band

Beating of Retreat

76th REPUBLIC DAY CELEBRATION Live streaming at :
<https://www.youtube.com/live/omHfDYb84ck?si=Pkl1Wrb3cpdVS9jG>

Hamas-i Israel nunger tetsür sepai pezü chiokogo


Tel Aviv, Aenjeti/January 25 (Agencies): Ceasefire tenangzüktepba nung shilem ka ama Hamas puri Gaza nung sota aliba Israel nunger tetsür sepai pezü chiokogo. Parnok ya Gaza City kübok Palestine Square nung Red Cross ketdangsürtem nem bendanga agüja liasü.

Honibarnü Hamas puri pua alirtem chiokba melena Israel-i linük kübok tepuokdak balala nung puoka aliba Palestine nunger 200 chioktsü imlar.

Gaza nung item sepaitem mechiok tsüingda mask semer Hamas aser Islamic Jihad fighters tem iba square nung adenshi, kong Palestine nungertema aika adenshia liasü.

Hamas züngsem noklang aika den Palestinian Islamic Jihad densema tanga Palestine nunger teloktema iba tesemi arua liasü.

Red Cross nungi lenirtem aser Hamas züngsem ka tsüingda tepuokertem mechiok tsüingda kuli



kaketka nung sign asüba nguogo.

Hamas-i, Israel nunger tetsür sepai pezü ya Karina Arieiv, Daniella Gilboa, Naama Levy aser Liri Albag ta jangjatsüogo. Par pezü yagi Israel military uniform semer liasü aser parnok chiokba mapang telok dak teka ayiplokja liasü.

Palestine Square nungi Al Jazeera atema osangbener Ibrahim Al Khaliji-i ashiba agi, tepuokertem chiokba ya otsüsütsü mapang ka liasü.

Honibarnü Israel army-i Red Cross nungi sepaitem agizükba osang jangjatsüogo

asert ashiba agi, parnok ya temang tendangtsü ta shisem.

"Kidangi meyipa aruba sepai pezü ya israel tonga aruba sülen IDF [Israeli army] special forces aser ISA [security agency] forces-i meiner senzüdar, kong parnok mezüing temang tendangtsü," ta army-i ashi.

Maneni Israel-ia, West Bank nung Ofer Prison aser Negev desert nung Ketziot Prison nung puoka aliba Palestine nunger 200 takaratiba nung chioktsü imlar.

Palestine nunger 200 nungi 121 bo taküm tepeyong tepuokdak ayutsü atema

obendang agütsür liasü aser ano nisung 79 mapang talangka atema tepuokdaki yoker liasü. Tepuokertem rongnung tambusangji arishi küm 69 aser tanobusangji arishi küm 15 lir. Maneni Palestine nunger neter deport asütsü lir aser parnok ya Egypt nung ghonda 48 anenzüktsü imlar.

Parnok ya Tunisia, Algeria aser Turkey nungeri yoktsü. Linük asemprongla yagi item Palestine nungertem agizüktsü mulunga agizükogo.

Tel Aviv kübok central square koba dang Hostages

Square ta ajar, iba tesem nung screen tulu ka nung tetsür sepai pezü indang noksa ya sayua liasü. Iba tesem nung adenshia aliba nübertemi Israel indang wako ayiploktsü aser kari Hamas puri pua aliba nisungtem indang poster amer liasü.

"Ni kanga pelar," ta adenshia alirtem rongnung Gili Roman-i Associated Press dang ashi. "Tenük mesepshidang second ishika tsüingda parnok taküm melenshitsu, saka tangyabo tajungba ka asoshi melenshitsu," ta pai ashi.

Tenangzüktepba nung shilem ka ama Israel nunger sepaitem Netzarim Corridor nungi atsüingintsü imlar. Iba ajanga pei ki toktsür jenshia or aliba Palestine nungertem northern Gaza nung pei kidangi meyipa aotsü atema lenmang lapoktsütsü.

Humanitarian teyari aser osettsüt balala yoktsü atema Israel-i south nung Rafah border crossing lapoktsütsü imlar.

Gaza kübok Bureij refugee camp nungi Al Jazeera osangbener Hind Khoudary-i ashiba agi, Palestine nungertem aikati Honibarnü tepuokertem melentepba ya kanga tongtibang ta züngshir, kechiyong iba ajanga parnoki northern Gaza-i meyipa aotsü asoshi lenmang lapoktsütsü.

Khoudary-isa, pei ki toktsür jenshia or aliba Palestine nungertem aika Wadi Gaza anasa adenshia lir aser Deobarnü nungi tenzüka north-i aotsü.

Sudan nung drone agi mozüki ka amak; nisung aika tepset

Khartoum, Aenjeti/January 25 (Agencies): Sudan nung Darfur tesem kübok el-Fasher nung inyaksangshia aliba mozükitem rongnung tatembangbuba drone ka agi amakba sülen shiranger aika tepsetogo.

Hokolbarnü Saudi Mozüki ya shirnoki amak aji mejangja saka medical sources-i ashiba agi, hopta ishika tejakdang kasa ki ya Rapid Support Forces (RSF) drone kati maka liasü.

Hokolbarnü iba ki amakba mapang emergency department nung shiranger 30 tepsetogo, ta kasa sangdong ajanga metetdaksü.

Regional governor Mini Minawi-i Honibarnü pa indang X account nung azü agi melangbanger aliba tasümantem indang noksa lemsatepa aser ashiba agi, iba tesem amakba sülen tetsür aser tanur densema shiranger 70 dak tema samatsüogo.

Sudan army aser paramilitary RSF na joko ita aika rara arudar. 2023 küm April ita nungi tenzüka RSF puri Darfur anüolen tesem tuluba ka atsüingogo.

RSF-i, May ita nungi North Darfur yimtiba el-Fasher sabanger lir, saka

army den sendaktepa aliba teloktemi RSF pur nongtema iba yimti matsüingdaksüi arudar.

El-Fasher nung healthcare facilities kanga atonga maka arudar, kong medical charity Doctors Without Borders-i iba ita ashiba agi, surgical capacity aliba Saudi mozüki ya dang tang tashi inyaksangshidar.

Linük ajunga nung healthcare facilities shilem 80 bo inyaksangshi mesüteti kümogo, ta official figures ajanga sayuogo.

Army aser RSF na raratep tenzüka sülen nisung meyirejang aika tepsetogo aser nisung million aika pei talidak ki toktsür jenshia aotsüsa akümba den linük nung nützünyongsük tesadang ka yatzür agi menepdaksüogo.

El-Fasher temeket nung Zamzam, Abu Shouk aser Al-Salam ta displacement camp asem nung ayawara agi menepogo aser May ita tashi nungbo yimti densema ano tanga tesem pongua meneptsü imlar, ta US-i teyari agütsüba bushisüingdang ka ajanga ngutetogo.

Khartoum nung RDF

puri headquarters sabanger aliba nongpokogo, ta Sudanese army-i ashiba sülen tang el-Fasher nung iba mozüki ya makogo.

Army-i ashiba agi, Bahri [Khartoum North] aser Omdurman nung sepaitem Armed Forces General Command nung amenoka aliba onok sepaitem den longjemogo.

Sudan yimtiba Khartoum nung Khartoum, Omdurman, aser Bahri ta yimti tongtibang asem lir, koba Nile ayong agi lemdanger lir aser yimti asemprongla ya senteper triangular capital ta ajar.

Army-isa, parnoki linük nung oil refinery tulutiba al-Jili oil refinery nungi RSF pur mintokogo, ta ashi.



Lt. IMKONGYANGER PONGEN (MANGMETONG) 13.01.1957 - 18.01.2025

Molungnen

Onok asür Lt. IMKONGYANGER PONGEN'er kinungertemi onok mangyim jashi tia nung aliba mapang shirnokisa onok dang temeim sayua nongitogo, nenok ajak dang kanga pelar. Nenoki asükhu lemsatepba, sarasadem nung bilemtetba aser mapang aser tashi intoka onok den tsüingtong arua mangyim jashi lemsatepba atema kanga pelar. Nenoki temeim sayua onok nongitba ajanga onok nem anisüingzük agütsüogo.

Onoki mejeta item kija aser lokti tentettem dang pelaba lemsateper:

1. Dr. Aoakhum Kichu, MD, Eden Hospital, Dimapur
2. Mangmetong Union, Kohima
3. Mangmetong Yimpang Pongener Kidong Telongjem, Kohima
4. Mangmetong Baptist Arogo
5. Mangmetong Pongen Kidong Telongjem, Mangmetong
6. Kohima Ao Baptist Arogo Lerie Fellowship
7. Kohima Longjang Fellowship
8. Aoyimsen Baptist Arogo

Onok temulung korema mangyimjashi nung liaka onok meketa temeimertem aika lir ta meteta iba ajanga onok nem anisüingzük agütsür. Nenoki maneni temeim sayuba aser sarasadem nung bilemtetba atema kanga pelar.

Temeim Jala, Anükapang, Semchir aser Temeibatem

Madison Keys-i Australian Open kokogo

HENRY ASER WAKANA NATI AO BOYS ASER GIRLS KIIJA ASAYA KOKOGO



Aenjeti/January 25, 2025 (Agencies): Honibarnü 2025 Australian Open tetsür kija asaya final nung America tsür Madison Keys-i set asem kanga toktepa asayaba sülen defending champion Aryna Sabalenka koka, la indang career nung mezüngbuba Grand Slam kokogo.

Set asem kanga toktepa asayaba sülen Keys-i 6-3, 2-6, 7-5 agi asaya koka Sabalenka-i iba asayamung asem buba atonga koka otsü tasen yanglutsü aliba nokdangogo.

Sabalenka, Grand Slam

pezübuba akoktsü nükjidong nung asaya liasü aser kasa mapang nung America tsür Keys shibai semifinal nung Iga Swaitek tsükdakja liasü, la-a mezüngbuba Grand Slam ka akoktsü nükjidong nung asaya liasü.

Keys aser Sabalenka na iba asaya masaya tsüngda ponguben asayar liasü aser Belarus tsür la yagi asaya pezübo koker liasü. Keys-i 2021 küm Berlin nung asayaba mapang Sabalenka koka liasü.

Asayar anaprongla la asaya terkaka khen danga

tamakok mongui asaya atur final nung ajurutep aser Keys-i la indang career nung kodanga masayadanga ama kanga junga asayateta World No. 1 asayar ya kokogo.

Australia Open nungsa Boys kija asaya Swiss nunger Henry Bernet-i kokogo.

Final asaya nung pai pa arishi küm 18 ajungba nü America nunger asayar Benjamin Willwerth 6-3, 6-4 agi koka taoba mapang iba asayamung koker alir Alexander Zverev, Nick Kyrgios aser Gael Monfils nunger den densemogo.

Maneni Girls kija asaya final nung Wakana Sonobe-i otsü tasen ka yanglua la ya Japan tsürtem rongnungi Australian Open girls' singles title abenba mezüngbuba asayar kümogo.

Arishi küm 17 tain asayar yagi Rod Laver Arena nung final asayar nung America tsür doubles champion Kristina Penickova 6-0, 6-1 agi koka liasü.

Japan tsür la yagi semifinal asaya nung No.1 seed Emerson Jones koker final tongteta liasü.

Kyle Walker AC Milan-i loan nung oa denogo

Aenjeti/January 25, 2025 (Agencies): England team nungi right-back asayar Kyle Walker, Manchester City nungi loan nung oa AC Milan nung denogo, ta club anaprongla yagi Hokolbarnü metetdaksü.

Arishi küm 34 tain Walker ya season nung tanungba asayatem Milan nungi asayatsü aser pa den teti asem tenangzüktepba yanglutsü akok.

Walker ya tang asaya aliba season City captain ama junga masayateti aruogo aser December 15 nü Manchester United makokba asaya nungi tenzüka tang tashi asaya ka nung danga tetenzük nungi masayai liasü.

Pa 2017 küm Tottenham nungi City nung oa aden aser Pep Guardiola lenisüba nung Premier League trok aser 2023 Champions League akokba sülen pai tang iba club toktsüogo.

"Manchester City... kong nungi tenzüksü? Iba tesüngmagtsü club nung 2017 küm adenba ya

nükjidong atalokba liasü," Walker-i social media nung zülutsü.

"Küm tetet tsüngda Champions League den nungtugu treble aser takok marok 17 akokba ya tanur asü dang pungmang ka dang liasü," ta pai ashi.

Serie A nung Milan pur tang tibuba nung lir, saka asaya pongu atonga akokba sülen parnok Champions League round of 16-i aitsü ana nung lir.

Tanga social media post ka nung Walker-i, AC Milan nung adentsü yonga ataba lemsatepogo. Pa iba club nung külem England nunger Fikayo Tomori, Tammy Abraham aser Ruben Loftus-Cheek nunger den asayatsü.

"Ni AC Milan nung adenba atema pelar aser nema adanger. Iba club puti otsü kanga takar aser ni tanur asü dang nungi iba club sülen anidaka aruogo. Iba club nung densemba ya tetushi ka aser Rossoneri tola semer asayatsü matateter," ta pai

ashi.

Walker-isa, "ground telung aser tema nung kü nem teyari agütsürtem jak dang kanga pelar. Nenok den yakta ajuruteptsü yongya atar! Forza Milan," ta ashi,

Pa den tenangzüktepba yangluba ajanga club nem teyari tulu agütsütsü kechiyong Brazil nunger right-back Emerson Royal yiruogo aser pa ita anabo masayatetsü.

City team yanglushiba mapang ka Walker-i club toktsüogo. Guardiola-i aniba team yagi iba season junga masayateti arudar aser parnok Premier League nung temaba jenjang nung aliba club Liverpool dang nungi point 12 agi tajemba lir.

City-i, Brehostibarnü Eintracht Frankfurt nungi forward Omar Marmoush pound million 59 agi alizükogo. Iba masü dang parnoki January transfer window nung Abdulkodir Khusanov aser Vitor Reis nata alizükter liasü.

Pakistan-i ayonga NZ aser SA den ODI tri-series ka asayatsü

Aenjeti/January 25, 2025

(Agencies): Pakistan Cricket Board (PCB)-i sangdong ka ajanga, New Zealand aser South Africa na den taruba tri-nation ODI series atema mapanglem metetdaksüogo.

Iba asayamung ya team asem asoshi ICC Champions Trophy atema renemshiba asayamung ka asütsü.

Iba asayamung ya single-league format nung asayatsü, koba February 8 nungi 14 tashi asayatsü renema lir.

Lahore nung nungtugu Gaddafi Stadium nung mezüngbuba asaya ana asayatsü aser iba sülen Karachi kübok National Bank Stadium nung league asaya tatembangbuba aser asayamung final asayatsü.

February 8 nü mezüngbuba asaya Pakistan aser New Zealand na Gaddafi Stadium nung asayatsü. February 10 nü New Zealand aser South Africa na kasa

tesem nung asayatsü.

Iba sülen Asayamung ya Karachi-i belener aotsü, kong February 12 nü National Bank Stadium nung Pakistan aser South Africa na day/night asaya ka asayatsü. Tri-nation series final ya February 14 nü asayatsü.

Pakistan aser New Zealand naprongla February 6 nü Gaddafi Stadium nung light tsükloker training agitsü renema lir aser South Africa team mezüngbuba training February 9 nü agitsü.

Gaddafi Stadium aser National Bank Stadium nung asaya pezü asayatsü aliba ajanga team asem nem taruba ICC Champions Trophy 2025 asoshi renemshitsü atema maongka tajung agütsütsü.

Iba den bendenloksema iba asayamung ya PCB asoshia alima dang yanglushir aliba venue tem sayutsü asoshi mapang tajung ka asütsü.

ICC Men's T20I Team of the Year nung India nunger asayar 4 lir

Aenjeti/January 25, 2025

(Agencies): Rohit Sharma, shiba lenisüba nung India team-i ICC T20 World Cup tanabuba koka liasü, pa ICC Men's T20I Team of the Year 2024 captain kümtsüogo. Iba team nung India nunger asayar Jasprit Bumrah, Arshdeep Singh, aser Hardik Pandya nungera densema lir.

2024 küm Sharma-i lenir aser asayar ka ama kanga junga asayaogo. Pai asaya 11 nung run 378 yanglu aser pa indang average 42.00 aser strike rate 160 dak tema liasü. Pai half century asem yanglu aser World Cup nung Australia den Super Eight asayaba mapang run 92 yanglua liasü.

India nunger asayatem rongnungi Arshdeep Singh-ia kanga jung asaya-a 2024 küm pai wicket timba agia liasü. Left-arm pacer yagi asaya 18 nung wicket 36 agi aser pa indang average 13.50 liasü. T20 World Cup nung USA den asayaba mapang Arshdeep-i kanga junga asaya-a pai run 9 agütsür wicket 4 agia liasü.

Kasa mapang nung All-rounder Hardik Pandya-ia 2024 küm asaya 17 nung run 352 yangluba den wicket 16 agia India team asoshi tongtibang shilem agiogo. T20 World Cup final nung Pandya-i kanga tongtibang shilem agia tatembangbuba over nung run 16 defend asü. South Africa den final asaya nung pai run 20 agütsür wicket 3 agia liasü.

Maneni Jasprit Bumrah mapang tatsüka masayai lir T20 asaya tenzüker aser pai asaya ti nung wicket 15 agia liasü. Pai küm tepeyong kanga junga asayaba ajanga pa ICC Men's Cricketer of the Year ama Sir Garfield Sobers Trophy asoshi nominate süa liasü.

ICC Men's T20I Team of the Year 2024: Rohit Sharma (c), Hardik Pandya, Jasprit Bumrah and Arshdeep Singh (India); Travis Head (Australia); Phil Salt (England); Babar Azam (Pakistan); Nicholas Pooran (wk; West Indies); Sikandar Raza (Zimbabwe); Rashid Khan (Afghanistan) aser Wanindu Hasaranga (Sri Lanka).

BILEMDANGANG

"Pei akaba agi temulung masürtem pela malir."